


# TEZAU LITURGIC

9 MAI

# ACATISTUL SF. CUVIOS-MUCENIC NICOLAE DE LA VUNENA



MOSCOVA, 2000



# **Акафист мученику НИКОЛАЮ ВУНЕНСКОМУ**

## **Кондак 1**

Избраннаго мученика Христова, от востока, яко звезду, возсиявшаго и в Вуненах священо подвижавшагося, венчаем песненными похвалы; во Христа бо облекийся, силою преподобных и мучеников украсился еси, емуже глаголем: Радуйся, Николае блаженне, мучениче Христов непобедимый и целебниче пречудный.

## **Икос 1**

Ангельское житие во плоти человечестей пожил еси, Николае, Христов страстотерпче, и яко человек разума Небеснаго показался еси. Сего ради подвигом твоим дивящися, зовем сице:

Радуйся, яко тобою Бог прославися.

Радуйся, яко тобою растлитель потребися.

Радуйся, любви Христовой стяжание.

Радуйся, лести и заблуждений посрамление.

Радуйся, высоту постничества, благочестивыя  
возносящая.

Радуйся, глубину страдания, враги  
поражающая.

Радуйся, яко светло от Востока сияеши.

Радуйся, яко страны Фессалии озаряеши.

Радуйся, преподобных отец единокровный.

Радуйся, мученик святых единокровный.

Радуйся, тобою бо умягчаются сердца.

Радуйся, тобою бо упраздняется злоба.

Радуйся, Николае блаженне, мучениче Христов  
непобедимый и целебниче пречудный.

### **Кондак 2**

Страх Господень основанием в души твоей от  
юности твоя положил еси, треблаженне, имже  
созидаея премудро, от начала грядущее  
предначертал еси, непорочно шествуя  
заповедями Бога Слова, поя Ему: Аллилуиа.

### **Икос 2**

Разума твоего богатством царь восхищаяся, на  
степень воеводы тя возводит, святе Николае;

темже многими добродетели ум предводителем  
противу страстей поставил еси, дела явив  
истинное звание. Сего ради слышиши ныне:

Радуйся, нравов благочестивых скрижале.

Радуйся, добродетелей честных вместилище.

Радуйся, глаголов Христовых исполнение.

Радуйся, ран Его запечатление.

Радуйся, цвете благовонный благолепия  
душевного.

Радуйся, крине краснейший благодати  
духовной.

Радуйся, яко явился еси непобедим во  
страданиях.

Радуйся, яко ликовствуши ныне во славе  
мучеников.

Радуйся, мудрым светлое уподобление.

Радуйся, всем верным наслаждение.

Радуйся, сило царей благочестивых.

Радуйся, копие на врагов неукротимых.

Радуйся, Николае блаженне, мучениче Христов  
непобедимый и целебниче пречудный.

### Кондак 3

Силу во бранех дивную показуя, мучениче славне, в подвизех священных яко воин Христов несокрушим показался еси, победивый полки невидимаго врага, поя: Аллилуиа.

### Икос 3

Имея жажду к житию благочестивому, аки елень ко источнику водному, на гору Вуненскую возшел еси с любовью, на нейже воды животворныя струи приявый, Николае, божественне оросил еси вопиющих ти таковая:

Радуйся, вся яже в мире красная презревый.

Радуйся, стопам Спасителевым последовавый.

Радуйся, воинство земное оставивый.

Радуйся, мужеством непобедимым обогативыйся.

Радуйся, служителю изряднейший Христа, тя призвавшаго.

Радуйся, благоговейный Его подражателю.

Радуйся, яко на рамена Крест Христов подъял еси.

Радуйся, яко бремя земное отвергл еси.

Радуйся, преподобных преславное удобрение.

Радуйся, верных многосветлый светильниче.

Радуйся, цвете безсмертныя благодати.

Радуйся, богатство присносветлаго сияния.

Радуйся, Николае блаженне, мучениче Христов  
непобедимый и целебниче пречудный.

### **Кондак 4**

Бурю страстей разрушивый, благодатию в  
подвизех безстрастия обогатился еси, заповеди  
Христовы прилежно исполняя и Ему Единому  
неленостно работая. Зрящия же усердие твое,  
Николае, вопияху Богу, тя укрепляющему:  
Аллилуиа.

### **Икос 4**

Слышим о тебе, страстотерпче, посреде  
сподвижников твоих, ихже яви Господь яко  
звезды светозарныя, на небе церковнем  
сияющия, с нимиже и ныне моли о нас,  
почитающих память твою и зовущих сице:

Радуйся, преподобных сияние.

Радуйся, страстотерпцев славо.

Радуйся, воздержания Божественное обоняние.

Радуйся, истины непоколебимый столпе.

Радуйся, юн сый телом, мудр же душею.

Радуйся, обретыи измлада добродетели.

Радуйся, яко озаряеши гору Вуненскую.

Радуйся, яка разгоняеши мглу демонскую.

Радуйся, добрый образе постников.

Радуйся, подвизающимся светлое зеркало.

Радуйся, Эмлады светозарное светило.

Радуйся, Фессалии священный светильниче.

Радуйся, Николае блаженне, мучениче Христов  
непобедимый и целебниче пречудный.

### **Кондак 5**

Видением и деланием душу твою, мучениче,  
украшивый и струями кровей твоих, яко  
порфирию, сию облекый, яко невесту непорочну  
ко Христу привел еси, взывая с верою: Аллилуиа.

### **Икос 5**

Крепок и неуязвим, яко воин Христов, на  
нечестивыя явился еси, страстотерпче,  
всеоружие бо света восприим, варварскую

лютость мужески победил еси. Сего ради с  
любовию зовем ти:

Радуйся, благочестия победо.

Радуйся, нечестия низложение.

Радуйся, мужества светлое начертание.

Радуйся, безумия врагов сокрушение.

Радуйся, добродетелей постнических финикс  
цветущий.

Радуйся, подвигов мученических кедре  
несокрушимый.

Радуйся, яко явился еси украшение  
подвижников.

Радуйся, яко показался еси омрачение варваров.

Радуйся, Христову силу уяснивый.

Радуйся, вражию крепость посрамивый.

Радуйся, яко тобою подвижники укрепляются.

Радуйся, яко тобою вернии помощи Божия  
сподобляются.

Радуйся, Николае блаженне, мучениче Христов  
непобедимый и целебниче пречудный.

## Кондак 6

Проповедует Ангел светоносен, с Небесе сошедший, тебе, Ангелу во плоти, и иже с тобою о венцах нетленных, уготованных любящим Господа, на подвиг мученический укрепляя вас, вопиющих Богу единомысленно: Аллилуиа.

## Икос 6

Копием священное твое и многострадальное тело уязвляя, врази лютыя причастна Христовых страстей соделаша тя, святе, имиже обретыи безстрастие, страстей избави зывающих:

Радуйся, преподобных споборниче.

Радуйся, мучеников сподвижниче.

Радуйся, благочестивых пристанище.

Радуйся, нечестивых поражение.

Радуйся, идолы поправый.

Радуйся, мучители твоя посрамивый.

Радуйся, яко тело твое за Христа кровию обогрися.

Радуйся, яко душа твоя ко Господу устремися.

Радуйся, узы и бичевания претерпевый.

Радуйся, наслаждения нескончаемого приобщивыйся.

Радуйся, призывающим тя скорый помощниче.

Радуйся, душевных и телесных недугов врачевателю.

Радуйся, Николае блаженне, мучениче Христов непобедимый и целебниче пречудный.

### **Кондак 7**

Хотяще бичеванием честное тело твое, богоносе, нечестивии умерщвлению предати, посекаху тя зело; ты же одежды тленныя совлекся еси, Николае, и в нетления ризу облекся еси, Богу вопия: Аллилуиа.

### **Икос 7**

Новый преславный мучениче, токами кровей твоих орошаеши Церковь Христову, яже правды плоды зрелья плодоносящи, благодать чудес твоих почитает, зовущи ти сие:

Радуйся, Церкви торжествующия украшение.

Радуйся, Церкви воинствующия укрепление.

Радуйся, Востока отрасли благоцветная.

Радуйся, Вунен насельниче равноангельный.

Радуйся, яко от юности последовал еси Христу.

Радуйся, яко уязвил еси врага супостата.

Радуйся, иночествующих световодителю.

Радуйся, благочестивых руководителю.

Радуйся, жития лучшего причастниче.

Радуйся, врага злейшаго посрамление.

Радуйся, тобою бо демони умаляются.

Радуйся, тобою бо людие светом Христовым озаряются.

Радуйся, Николае блаженне, мучениче Христов непобедимый и целебниче пречудный.

### **Кондак 8**

Странно бысть неверующим зрети, како ты, святой страдальче, ко древу привязан быв, нещадныя мучения терпеливо переносил еси; темже возвратился еси ко древу жизни вечныя, Господеви поя: Аллилуиа.

### **Икос 8**

Вся мучения мужественно претерпев,  
страстотерпче, усечением главы твоея со

Христом навеки соединился еси. Сего ради молися о нас, благочестно ти вопиющих:

Радуйся, истины насадителю.

Радуйся, лести упразднителю.

Радуйся, воине Христов преизрядный.

Радуйся, благодати Духа Святаго сосуде избранный.

Радуйся, богоносным подвижником славо.

Радуйся, победоносным мучеником похвало.

Радуйся, яко Фессалию славою чудес твоих озаряеши.

Радуйся, яко призывающих тя прошения исполняеши.

Радуйся, постничества образе.

Радуйся, терпения учителю.

Радуйся, врагов безумие низложивый.

Радуйся, верных чудесы озаривый.

Радуйся, Николае блаженне, мучениче Христов непобедимый и целебниче пречудный.

## Кондак 9

Вся Фессалия, Эллада и инья страны  
проповедуют благодать чудес, юже ты от Бога  
улучил еси: всем бо верою к тебе притекающим  
подаеши просимое и исцеляеши поющия:  
Аллилуиа.

## Икос 9

Глаголом твоим милостивым Фессалийский  
правитель доверився, поспеши в Вунену  
благоговейне, обретше же святяя мощи твоя,  
мучениче преславне, исцелися от недуга и в  
веселии возгласи тебе:

Радуйся, крепосте немощных.

Радуйся, утешение скорбящих.

Радуйся, чудес благодать приемый.

Радуйся, демонов державу сокрушивый.

Радуйся, яко тяжко болящаго уврачевал еси.

Радуйся, яко сему здравие чудесне даровал еси.

Радуйся, яко тело твое смотрением Божиим  
нетленно соблюдеся.

Радуйся, яко честная глава твоя на исцеление  
верным дадеся.

Радуйся, унывающих присное ободрение.

Радуйся, болящих скорое врачевание.

Радуйся, яко тобою от страстей душевных  
свобождаемся.

Радуйся, яко тобою от ран телесных исцеляемся.

Радуйся, Николае блаженне, мучениче Христов  
непобедимый и целебниче пречудный.

### **Кондак 10**

Тело твое святое, мучениче преславне, нетленно  
пребывавшее в дубраве Вуненстей,  
Божественным действием дивно обретесе; ныне  
же изволением Божиим, яко многоценное  
сокровище, благодать подает взывающим:  
Аллилуиа.

### **Икос 10**

Стена неборимая и заступление Божественное  
тобою нам дадесе, страстотерпче Николае. Сего  
ради укрепи нас молитвами твоими, от всякаго  
обстояния избавляя, вопиющих ти:

Радуйся, радости Ангелов.

Радуйся, славо страстотерпцев.

Радуйся, Церкви хранителю крепчайший.

Радуйся, Фессалии сияние светозарное.

Радуйся, яко мощи твоя нам открыл еси.

Радуйся, яко исцелений источник нам явил еси.

Радуйся, верою к тебе притекающих  
помощниче.

Радуйся, болящих утешителю и целителю.

Радуйся, яко недужным состраждеши.

Радуйся, яко слезы плачущим изсушаеши.

Радуйся, яко тобою благословение даруется.

Радуйся, яко тобою злоба умерщвляется.

Радуйся, Николае блаженне, мучениче Христов  
непобедимый и целебниче пречудный.

### **Кондак 11**

Воспе твою благодать исцеленный твоим  
заступлением Евфимиан, и вси вернии, твоя  
милости улучившии, восхваляют прославльшаго  
тя Господа, зовуще Ему: Аллилуиа.

### **Икос 11**

Светозарная память твоя, яко весна радостная  
мирови показася, и якоже цветами даров твоих  
облагоухала есть верных собрание, и ныне

фимиам нетления источает всем глаголющим ти  
таковая:

Радуйся, жертва Христова благовонная.

Радуйся, верных теплое предстательство.

Радуйся, нетления ниво многоцветная.

Радуйся, христиан пристанище необуреваемое.

Радуйся, благовоние веры и кадило  
животворное.

Радуйся, мироварнице духовная благодати  
Богоначальная.

Радуйся, яко подаеши всем исцеления.

Радуйся, яко явился еси всем скорбящим  
увеселение.

Радуйся, о верных усердный ходатаю.

Радуйся, пред Богом наш заступниче.

Радуйся, яко радости непрестанная  
причащаешься.

Радуйся, яко жизни вечная наслаждаешься.

Радуйся, Николае блаженне, мучениче Христов  
непобедимый и целебниче пречудный.

## Кондак 12

Благодати богатство Небесное стяжавый –  
честную главу твою – радуется остров Андрос и  
веселится обитель Николая, святителя Мир  
Ликийских, яко сокровище многоценное сию  
хранящая и Спасителю всех Богу вопиющая:  
Аллилуиа.

## Икос 12

Поющи в вышних со Ангельскими чинми  
Трисвятую песнь, умоли, Николае, всякия  
нужды избавити и скорби верою к тебе  
притекающия и единомысленно ти поющия:

Радуйся, Ангелов сожителю.

Радуйся, бисере Господень.

Радуйся, богоносных отец равночестный.

Радуйся, святых подвижников равновенчаный.

Радуйся, преподобный в мученицех и Горних  
причастниче.

Радуйся, благодати богоносный подателю.

Радуйся, неизреченных созерцателю.

Радуйся, в скорбех избавителю.

Радуйся, яко тобою от страстей избавляемся.

Радуйся, яко тобою света исполняемся.

Радуйся, пред Богом наш верный предстателю.

Радуйся, всех благочестивых радости.

Радуйся, Николае блаженне, мучениче Христов  
непобедимый и целебниче пречудный.

### **Кондак 13**

О Николае мучениче, воине Господень и  
преподобных славо, от всякаго скорбнаго  
обстояния и искушений многообразных избави  
нас, любовью чтущих тя и Троице  
Живоначальной вопиющих: Аллилуиа.

(Этот кондак читается трижды, затем икос 1 и  
кондак 1)



**ПОЛНЫЙ  
АКАФИСТНИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

**І**

**НУЖЕ  
НЕБО**